

明。三 圻撰

續文獻通考(八)

明萬曆刊本

文海出版有限公司印行

續文獻通考卷之七十二

皇明進士雲間王圻纂輯

節義考 孝子四 金元 孝釋附 皇明

金

陳顏汲縣人父光為家奴誣告賊殺人繫獄不勝拷訊因自誣服顏詣郡請代父死郡守哀之不敢決適帥臣至郡以其狀白帥曰此真孝子也遂併釋之太宗天會七年詔旌其門閭

劉政洛州人性至孝母目喪明政旦夕餽之母忽能視後母有疾剖股肉啖之疾即愈詔旌其廬除太子掌飲丞劉瑜棣州人母喪不能具葬質其子以給喪事章宗明昌

三年詔賜粟帛復其身

溫石相州人幼孤八歲奉母居郡南後母以天年終石自  
穿土起墳既葬親舊勸令歸石曰營緝未就姑待之時  
石已骨立親舊恐其遂死固勸令歸石曰祥而歸未晚  
也竟至禫祔廬側設竈旦作粥一盂析爲三食之不復  
舉火負土累月鄉人願代之石稽顙謝曰非石願也垂  
老時享祭器必親滌年七十有一而卒

劉全武陟人性至孝金末河朔擾攘父源母崔氏俱爲北  
兵所掠父病卒母被鬻不知所往全就虜而去後三年  
以母故祝天子身南道尋訪于祁蠡之間數月果得母  
所在哀號祈請主家拒而弗許全行乞于市得金若干

贖之而復爲母子者三十餘年克盡孝敬

薛繼元字曼卿河東人事母孝所居化之

元

詹士龍字雲卿固始人宋都統鈞之子元兵破鄂鈞歿士龍甫三歲董忠獻公獲之以見世祖嘆曰此忠臣子也汝善養之旣長知非董出晝夜痛哭他日從獵潭沱懇求復姓忠獻戲曰原欲復爾姓乎試爲投石水中浮則爾從士龍祝天曰吾父有靈石當暫浮因以石投水中沉而復浮者數四忠獻愕然曰天也遂許之

廖人俊寧都人元初父死于寇母亦被虜人俊七歲與祖母居旣長誓求父骨得于叢塚間又徃北方求母聞在

滄州至則已死欲負骨歸葬異父弟不許遂刻母像而還合葬焉吳澄有文記其事

王閏東平瀕城人事父甚孝父嘗卧疾夜失火不得出閏突入解衣裳父抱而出之肌體灼爛父無少傷中統二年復其後

郭道卿閩人義重五世孫至元初閩盜起與弟佐卿守孝子祠不去被執兄弟各求代死賊感而釋之子廷偉爲建寧路平準庫使辭歸侍養道卿嘗病岫危甚廷偉憂悴扶護一夕髮盡白有司言狀旌之

周古象蘄水人元初兵虜至蘄著蒙古氏旣生子未嘗喜妻詢其故曰有母在欲得歸省妻許之且囑曰母在當

奉養勿以妾故復來及歸母尚無恙古象奉養盡孝母  
歿廬墓妻亦終身不嫁淮西憲僉韓克莊爲立孝里門  
蕭道壽興平人家貧鬻鍼自給母年八十餘奉養盡禮每  
旦夫婦親自盥櫛母食然後退就食母寢然後退就寢  
出入必告母怒欲笞之道壽自進杖伏地而受起則再  
拜遠教母疾刲股肉啖之而愈至元八年朝命賜羊酒  
表其門

郭狗狗平陽翼城人父寧爲欽察先鋒使首領官戍大梁  
平宋將史太尉來攻寧全家被俘史將殺寧狗狗年五  
歲告史曰勿殺我父寧殺我史驚問知其歲曰五歲兒  
能爲是言吾當全汝家即以騎送寧等往合州道遇國

兵騎驚散寧家俱得還事聞旌之

周良佐唐山人事親孝親歿廬墓三年至元間旌表其門  
孔全鹿邑人父成病全割股肉啖之即愈後卒居喪盡哀  
廬于墓側負土爲墳日六十肩風雨有虧俟霽則補之  
三年起墳廣一畝高三丈餘至元間詔旌其門

田改住汶上人父病不能愈禱于天去衣卧冰上一月同  
縣王住兒母病卧冰上半月

孟君用臨川人至元間兵掠臨川君用生三歲母被驅不  
知所往後求得之則已歿矣請喪歸葬不從乃號慟墓  
下得其遺衣杯棬以還而喪祭焉

甯猪狗山丹州人母七十餘患瘋疾藥餌不効猪狗剖股

肉進啖遂愈歲餘復作不能行猪狗手滌溷穢護視甚  
周造版輿載母夫婦共舁行園田以娛之後卒居喪盡  
禮鄉里稱焉

李家雙潭州萬戶移刺瓊子也母病醫不可治割股肉和  
糜以進病乃痊撫州路總管管如林渾州民朱天祥並  
以母疾割股旌其家

畢也速答立迷裏氏秦州人父喪廬墓次晝夜悲號有飛  
鳥翔集墳土湧起

尹夢龍中興人母喪負土爲墳結廬居其側手書孝經千  
餘卷散鄉人讀之有群鳥集其塚樹

胡景清龍溪人元兵下漳南景清甫五歲隨父母逃難倉



卒失其母景清長知學每念母輒涕下一日辭其父抵  
幽薊覓之于燕市遇其叔胡巨川知母已至燕而未知  
其處踰年始得之蓋母子不相見者四十年矣事聞詔  
旌表之仍給驛以歸

陳譽字譽夫福清人性孝友至元中母林氏病譽割股肉  
療之子觀泗字友達亦篤孝父母疾俱嘗割股肉和粥  
以進

張鏐下蔡人事母至孝母卒居廬三年致有紅連變白之  
異郡立孝蓮坊事聞大德二年旌表

陳韶孫廣川番禺人父瀏以罪流肇州韶孫年十歲朝夕  
號泣願從遂與俱徃道過遼陽平章塔出見而憫焉曰

吾返汝故鄉汝願之乎韶孫曰旣不能以身代父當死  
生以之歸非所願也大德六年父死韶孫哀慟見者爲  
之泣下肇州萬戶以聞命遣還里仍旌異之

張子夔安西人父喪每夜半以背負土肘膝行地匍匐至  
葬所篩細土爲墳

李忠晉寧人幼孤事父至孝大德七年地震山移民居皆  
摧壓將近忠家分爲二行五十餘步復合

吳國賓雷州人父喪廬墓大德八年境內蝗害稼惟國賓  
田無損

章卿孫蜀人本劉氏幼爲章提刑養子與母富氏相失三  
十八年遍訪于江西諸郡迎歸養之旌其家

李鵬飛池州人生母姚氏爲嫡母不容改嫁爲朱氏妻鵬  
飛幼不知也年十九思慕哀痛學醫濟人祈早見母行  
求三歲至蘄州羅田縣得焉時朱氏家方疫鵬飛起之  
遂迎還養父之復歸朱氏時渡江省覲旣卒歲時携子  
孫往祭墓終其身事聞旌其家

徹徹祖思古氏幼喪父事母篤孝稍壯母沒慟哭頓絕水  
漿不入口者三日旣葬居喪有禮年四十餘思慕如童  
孩每見人父母則嗚咽流涕曰人皆有父母我獨無至  
大三年褒異

王初應漳州長泰人至大四年從父義士樵劉嶺山虎搏  
父傷右肩初應抽鑣刀刺虎鼻殺之父得生同縣施合

德泰定二年父真祐出耘爲虎扼于田合德與從弟發仔持斧前殺虎父得生並旌其門

李茂大名人徙家揚州母病目失明茂禱於泰山神三年復明每夕祝天乞損已年益母壽及期母歿哀慟幾絕大德間揚城火燒千餘家及茂廬反風滅火事聞旌表廡希憲字善甫布魯海牙子也至元元年丁母憂率親族行古喪禮勺飲不入口者三日慟則嘔血不能起寢卧草土廬于墓旁宰執以憂制未定極力起之相與詣廬聞號哭聲竟不忍言

祖浩然字養吾建寧浦城人至元中盜黃華起政和朝廷命將帥師往討未至盜已就縛回軍經浦城焚其廬舍

浩然母全氏遭掠而北是時浩然年六歲母子相失者  
二十八年至大三年福建閩府檄爲三山書院山長將  
之任或告之曰而母在河南不能名其處浩然欣然棄  
職辭父抵河南每舍逆旅行道塗間聞操南音者必就  
與語或云此有趙副使故爲軍校歸自軍中得婦人全  
氏非而母耶趙死而家替全氏歸一蒙古氏挈之而南  
當在汝鄧間耳浩然喜遂回汝州抵鷓鴣路山不遇至牛  
蹄白石不遇至棗陽雀橋又不遇浩然夢神人顧而言  
有月缺再圓之語益喜怵自雀橋至別蓋山訪其母在  
馬抱持涕泣遂奉南歸人皆歌詩以美之會稽韓莊節  
先生性作孝子傳行于世

樊淵句容人至元中奉母避兵茅山兵至欲殺其母淵求  
以身代兵兩釋之母歿哀慕終身臺憲交薦淵不忍去  
墳墓終不起皇慶初旌其門

黃直星子人皇慶壬子母疾割股爲藥疾即愈郡守立碑  
以彰其孝

賴祿孫寧化人延祐初賴寇作亂祿孫負母挈妻子入山  
寇至祿孫守母不去欲刃其母祿孫以身蔽之曰寧殺  
我無殺我母時母病渴乏水祿孫含唾哺之盜竊窺相  
顧嘆駭不忍害有掠其妻去者衆盜責曰柰何辱孝子  
婦使歸之事聞旌表

朱良吉平江常熟之支塘里民也延祐乙卯母錢氏年六

十餘病將死良吉沐浴禱天以刀剖胃割取心肉一片  
煑粥以飲母食粥而病愈良吉心痛就榻不可起隣里  
憐其欲絕乃累財醮告神明陰祈佑之是日邑人俞浩  
齋聞而過其家觀良吉胸間瘡裂幾五寸氣騰出痛莫  
能言俞爲納其心以桑白皮線縫合未及期月已無恙  
陶九成曰人以父母遺體而剖心剖股恐其傷生故有  
禁止之令然世降俗薄悖逆其父母者視良吉何如哉  
原其一念之純剖心之際動天地感鬼神固不待賞之  
于有司而天地神明固已陰錄其孝矣

匡國政母病剖肝以進病愈旣而復病又剔腦和藥愈之  
及卒廬墓終喪延祐中旌表

丁文忠鄆城人業鼓冶母和氏疾與弟文孝竭力調待母卒文忠廬墓側不與妻面者三年父貴又病醫不能療文忠造車一輛兄弟共御之載父禱于嵩山五臺泰安河瀆諸祠遇異僧遺藥而愈延祐七年旌之

邵敬祖宛丘人父歿廬墓母繼歿河決不克葬殯于城西敬祖露宿依其側風雨不去友人哀之爲縛草舍庇之前後居廬六年兩髀俱成濕疾至治三年旌其家

越楓橋里人丁氏母雙目失明丁至孝每朝盥漱訖即舐母之目積有年矣俄而母左目明未久右目復明憲司上其事于朝表其閭曰孝子之門蓋至治年間也

黃覺經南城人五歲失母稍長誓天誦佛書願求母所在



乃渡江涉淮行乞而往衝風冒雨備嘗艱險三十八年  
得之梁縣至治中旌表其門

尹華浦川人至治初遊學于京師忽夢母疾心怪之馳歸  
母已亡居廬蔬食哀毀骨立每雞鳴起手治祭饌詣墓  
所哭奠雖風雪不廢父輔臣嘗病瘵華侍湯藥衣不解  
帶夜則禱于天願死以代父命數日疾愈鄉里嗟異之  
孫希賢高唐人母病痢方書曰血温身熱者死希賢嘗之  
其血温乃號泣祈天求代母遂愈

卜勝榮高郵人母痢不能藥日嘗糞以求愈兄疾禮北辰  
乞減已年延之並痊

宗祀大都人年十九父內宰卒擗躄號泣絕而復生過哀